

四庫全書

集部

欽定四庫全書

可齋雜藁卷十

宋 李曾伯 撰

啓

除廣西帥謝丞相

槐庭播物揭公道以宏開桂筦掄才起陳人於久廢循
牆靡徇入境是共佩埏埴之恩榮肅穎泓而聲謝惟今
西廣迺古南交延袤封壤二十五州控引蠻方幾千餘
里當皇祐弭寇備勤余狄之經營至淳熙承平相繼范

張之鎮靜大槩自渡江之後未嘗為戍嶺之防財計則轉而上供軍籍亦從而內省條然近歲憂及遠人驩言獸蹄之道可通疇謂馬腹之鞭不及迨天之未陰雨貴及是時如人之護風寒不止數處幸寬上顧宜屬重臣如某者百拙奚堪一愚寡與半生疆場驅馳雖罄於臣忠連歲邱樊耕鑿具知於帝力髀肉生而老將至皮毛落而骨僅存嗟人情甚於含沙顧世味已如嚼蠟曲憐小已獨賴大鈞丞相數言將軍密回上聽朝臣不可光

祿力屏羣言方當風霜摧折之餘再有天日開明之望
舊醴盡復新綵沓頒壁府圖書陞之華選琳宮香火寵
以殊榮已幸獲為全人詎敢萌夫妄想忽拜九霄之雨
露俾臨五瘴之山川昕詔有嚴暑行豈憚百年松壠昔
稱上冢之榮萬里梅花獲繼宜人之賦感鴻恩其甚至
揆駑力以奚勝冒爾祗承慊然報稱恭惟某官立生民
極為帝者師奉八柄以馭臣運此橐籥鈞陶之妙不一
青而棄士付之權衡尺度之公凡御屏間記之人皆夾

袋搜揚之數肆求循吏將惠遠民不啻聞片言之善若
決江河直欲使八荒之域如在畿甸察某昔素無於大
過知某尚可勉於後圖遂使疎庸仍叨東拔某敢不洗
心奉職畢力酬恩如錢穀甲兵未敢瀆廟堂之問惟忠
信篤敬庶期行蠻貊之邦

謝參政

巖廊播物不一青以棄人嶺嶠掄材俾十連而作帥服
龍光之拔拭佩鴻造之作成領篆云初奏緘敢後惟今

西廣迺古南交延袤封境二十五州控引蠻方幾千餘里當皇祐弭寇備勤余狄之經營至淳熙承平相繼范張之鎮靜大概自渡江之後未嘗為戍嶺之防財計則轉而上供軍籍亦從而內省倏然近歲憂及遠人驩言獸蹄之道可通疇謂馬腹之鞭不及于慮而得可一寧過綢繆四隅而備其三詎容疎略其於此際可付非才如某者已試罔功至懦不武驅馳半世平生對越者此心憂患中年生意凋零而如髮結草莫知於報國食芹

徒抱於愛君敢意休明未忍擯絕俯念皮毛之剝落盡
還面目之本來特畀祠官已叨宸寵載峻西清之直遽
分南服之權昕詔有嚴暑行敢憚上冢拜松楸之舊及
郊觀巖洞之奇不謂衰齡乃獲繼駉鸞之賦祇慚綿力
恐將重騎鶴之譏如痿人雖起於刀圭而駑駕懼顛於
轡策孰為之地我有此天恭惟某官命代真儒熙朝碩
輔下丞相之一等佐天子之萬幾建大政興泰平千載
可占於今日躋吾民納仁壽八荒無間於同雲維持公

論之主盟培植人才之氣脈成已成物幾同茅茹之彙
升使過使功不忍邱樊之終棄遂令衰朽載玷寵榮某
敢不惟既乃心恪恭厥職如忠信篤敬之行蠻貊雖不
敏願學焉倘甲兵錢穀之問廟堂微大賜弗及此

謝侍從

杜門省谷甘投東里之閑分閫疏恩俾趣南州之戍既
循牆而弗遂爰領篆以服勞戴德有歸修辭敢後睠今
五筦在國一方井分滄海之封圻星布青邱之蠻落當

皇祐弭寇備勤余狄之經營逮淳熙承平相繼范張之鎮靜大概自渡江之後未嘗為戍嶺之防財計則轉而上供兵籍亦從而內省倏然近歲憂及遠人驩言獸蹄之道可通疇謂馬腹之鞭弗及迨天之未陰雨毋失是時如人之護風寒何止數處幸寬上顧宜屬重臣如某者鐵硯違心鉛刀誤手歷諸邊之幕府功茂絲毫任兩道之藩垣罪彌頂踵耿耿孤忠之如日蕭蕭雙鬢之已霜既幸投林詎萌出岫方歎皮毛之剝落忽還面目之

本來特畀祠官已叨宸寵既峻西清之直遽膺外屏之
權昕詔載嚴暑行敢憚上冢拜松楸之舊及郊覩巖洞
之奇不謂衰齡乃獲繼驂鸞之賦祇慙綿力恐重貽騎
鶴之譏如痿人雖起於刀圭而鴛鴦懼顛於轡策孰為
之地哉有此天恭惟某官二南股肱西東冠冕虞秩宗
典三禮禁甬班高楚倚相讀九邱經惟任重愛士有如
於桐梓持心無異於權衡謂大厦非一木之功而八荒
如我闔之內獎拔不遺於餘力寵榮遂及於孤蹤惟既

乃心以稱知己烟嵐眯目祇虞疲沓之難支風雨棲身
所恃幘幪之終賴

謝給舍都司

笠澤訪漁甘驚鱗之深逝桂林選救命老馬以載驅屢
慊若以循牆茲冒焉而及境作成有自推謝敢稽伏念
某蹇步蹢躅壯心凋落平生幾屐疲疆場以何之卒歲
一裘老田園而足矣嫠緯不遑於夜緝娥眉方逞於春
妍既幸投林豈應出岫誤玷上恩之杖拭復膺外屏之

蕃宣睦粵一方去吳百舍星布青邱之蠻落井分滄海
之封圻驩言獸蹄之跡可通或慮狼子之心叵測正資
經畫上釋顧憂痿人雖起於刀圭駕駕懼顛於轡策嗟
戲衫已脫豈堪鮑老之笑人顧碁局方新未見奕秋之
出手凜其責任孰是主張恭惟某官禮樂宗工嚴廊碩
輔詞頭曉播摘毫皆華國之文勅尾夕披論事有回天
之力愛士等圭璋之重持心猶砥石之平謂大廈非一
木之功而八荒如我闡之內獎拔不遺於餘力寵榮遂

及於孤蹤惟既乃心以稱知己烟嵐眯目祇虞疲沓之
難支風雨棲身所冀解幃之終賴

謝尚書

東里投閑知己愆之退省南邦選任奉王命以來宣凡
公朝拔拭之由皆禁路吹噓之力俶臨賤次敢後謝緘
睽粵一方去天萬里自先秦之置戍與諸蕃以為鄰上
下千載聞有外憂西北二方不虞吾涉條謂獸蹄之通
道凜將馬腹之及鞭四隅而舉其三固防窺隙千慮而

得有一尤懼慢藏此其或者之見幾不止目前之思患
聿寬上顧宜屬重臣如某者已試罔功至懦不武驅馳
半世平時對越者此心憂患中年生意凋零而如髮結
草無從而報國食芹猶抱於愛君敢意休明尚加柬拔
俯念皮毛之剥落盡還面目之本來祠廩甫頒藩符驟
畀徒慕矍鑠翁之勇往不知襁褓子之良勞懷騎鶴之
舊遊真成昨夢訪驂鸞之遺躅殆類冥行猶痿人雖起
於刀圭懼駕駕將疲於轡策孰為之地我有此天恭惟

某官海宇宗工巖廊碩望股肱宣力歷四岳以奮庸喉
舌歸班指三階而布武愛士有如於桐梓持心無歉於
權衡謂大廈非一木之功而八荒如我闔之內不忍棄
捐於苦李遂令汎埽於甘棠惟既乃心以稱知己去漢
關未遠當有講若畫一之規問羌敵何如願主是者什
三之奏

除京湖制置謝宰執

披圖授略昭遠覽於上流賜履專征收孤蹤於遐嶠龍

渥自鈞陶而出駑材忘負乘之羞祇事云初修辭敢後
睠荆南郡在國西門允為古今用武之區全在牧守得
人之重必呂蒙薦遜一戰遂以疆吳有陶侃代舒中原
未敢輕晉吁嗟近比感慨往時玉壘相聯每若纓冠之
急金甌一闕浸如墮甌之輕不應山河風景之殊孰謂
江濤人物之眇舉茲重寄付此庸人如某者知與齒疎
心隨髮短飽餐晝卧方願為大庭之民被酒夜行何敢
問霸陵之吏曲加杖拭再試蕃宣僅成一冬炎嶺之吟

敢作六月太原之想從天而下易地則然平蕪遠墅猶
記舊遊老校退卒能談往事勉承鞭策雖管仲之馬粗
知徒黍豆芻恐景升之牛莫戴涓塵力淺山嶽恩深恭
惟某官為帝者師立生民極相司馬矣遼人謹邊隙之
弗開此潞公耶敵使歎少年之莫及措四郊於磐石屹
一柱於明堂戒徹桑以明政刑了無遺算賦采薇而遣
戍役罔有棄材取豫建侯在師錫命某敢不銘銜洪造
激烈丹衷朝廷有弱翁當是後將軍之策江漢慕召虎

願揚明天子之休

謝侍從

疆南海以餘方慙非良翰國西門之易命畀以扞關被
昕詔之趣行冒暑塗而祇戎敬蠲柔訥肅控謝私伏念
某已試罔功至愚弗穎驅馳半世身險阻以飽更憂患
頻年影伶俜而浩歎收棄捐於中道感杖拭於上恩炎
嶺一冬正敷為邦之譽太原六月豈堪共武之行睠茲
熊楚之舊封自昨犬戎之多難大江之北獨壁壘之僅

存方城以南殆荆榛之彌望將新區畫獨俾繆庸雖老
馬昔所經行而羸瘠詎能負載為之地者端有人焉恭
惟某官朝廷羽儀人物模楷謀謨上側將如元首之有
股肱經制邊方不啻一身之使臂指遂蒙推輓猥玷藩
維自憐無叔子之才慰褒耆舊孰與主將軍之策賴漢
公卿

兼湖廣總領屯田使謝宰執

易地榦方甫問邊藩之戍自天申命俾兼耕餉之司渙

加大造之扶持益重小人之責任戴恩隆厚拊已凌兢
竊惟理兵足食有國之大經因田制穀當世之急務郁
侯之佐漢業始兼舉於關中孔明之抗魏師嘗交修於
渭上自昔於斯二者若人乃能一之矧今上流有嚴外
治合兵財而供調度講農戰以強本根通融一家經營
幾載然且庾粟腐紅之未見田萊荒白之尚多非得實
能曷堪並任伏念某壯雖有志老已無能猶十駕庸材
何能追於千里以儋石微負疇克舉於百鈞誤被甄鎔

仍奉鞭策觸熱甫祇於官次防秋已在於目前給竈攸
司代庖是愧正慮急癸庚之呼詎容緩戊巳之屯公銅
悲以付之僉論為之駭若意徒欲廣其如北海之疎力
盡猶求正恐東野之敗匪依所覆何時不虞恭惟某官
學者津梁國之柱石弼亮中興之世運作成後進之人
材戎馬器械之修將圖回於境土錢穀甲兵之問加軫
念於廟堂致蒙收烟瘴之孤蹤畀風寒之隆委顧多取
數乃二得兼某敢不砥礪丹衷銘銜洪造仰承長算懼

無營平期月之功竊慕古人願課叔子季年之績

陞徽猷閣謝宰執

再陞閣以護師俾華易地三循牆而辭寵靡克回天拜
綸綍以增榮佩鈞陶之有造伏念某素無他技誤辱殊知
付之江漢之一方畀以兵食之二者蝥螽負岳任重力
綿臚鼠飲河分踰量溢用避西廂之超躡願殫南紀之
蕃宣表雖極於陳情令弗蒙於反汗組文璀璨光騰雲
漢之章袞字陸離價重瀛洲之選鞠躬肅拜斂衽知歸

恭惟某官登明選公集思廣益儲人材於夾袋以副東
求覽天下之輿圖不輕委任致令塵陋疊被恩榮當勉
竭於駑材用仰酬於鴻造古人遠矣力辭敢效於南城
小子斐然私謝敬陳於東閣

荆閬一年謝宰執

將卻穀之中軍氣難再鼓書陽城之下考恩重一陶潔
子墨以修辭扣主書而布謝伏念某心隨髮短智與齒
疎西嶺東淮等飛鴻之踏雪北雲南夢驚老馬之依風

二事猥共一毫何補冒焉甲戌之築愧乏前籌問之庚
癸之供凜虞後爨賴春秋之知我勉夙夜以在公正茲
惜陶侃之分陰倏又見宣王之六月圉身洪造鑄德丹
衷恭惟某官以帝者師立生民極六計會吏某勤某怠
之必稽八柄詔王予廢予置之自出尚容玩愒端藉覆
持某敢不食息知歸靡涓思報兵可決以期月倘能了
湟水之屯農將告以及春當即上柴桑之請

轉正議大夫謝宰執

海島平巒捷上來庭之款巖廊賞士秩加去位之官亞
三品以升班愧一毫之何力循牆弗獲跼地知歸眷惟
朱崖黎母之陬時有潢池赤子之釁隔鯨波之浩渺踞
鼠穴以憑陵向桴鼓之屢驚率皆累歲近干戈之輕動
亦且暮年勦之不足以示威縱則又幾於逆命弗圖倣
擾汜底還安某庸甚樗材頃為桂牧不敢以少敵而忽
況有蜂蠆毒乎未嘗以多殺為功猶毆蟪蛄而已起久
閑之老將姑一出於輕師軍聲甫揚敵氣隨折端自威

靈之昭布敢希優渥之誕頒奮漢將之樓船曾微顯績
施隋宮之門戟曷稱新榮不有此天孰為之地恭惟某
官濟時碩輔貫日忠忱謂軍國之有紀綱一賞豈輕於
僥予視鎮海而如畿甸羣情自得於周知大造不私小
勞亦錄某敢不祇承休德勉厲愚衷以南方付之豈敢
復言於願事願北邊晏若庶期卒就於蔡功

除寶文閣學士制置大使謝宰執

分陝來宣疆理之告王之績登瀛疏寵藩垣加命使之

名共二事以俾仍至屢辭而弗許恩隆塊北感極輪囷
竊觀治平建閣之初以晦叔始居是選紹興分閫之際
必元鎮乃大厥官是皆昭聖代之寵綏于以重儒臣之
鴻碩倘略微於成效曷兼紹於前修如某者猥備重弓
已衰再鼓縈心國事眉無一日之伸過眼歲華髣髴三
霜之老矧值時之水潦敢馳想於關河屬自桂林已膺
奎札勉畫遵於玉斧期缺補於金甌然如張華杜預之
意豈盡同必知孫綽蔡謨之議謂未可曾弗度時而量

力不圖成事之因人江山復識日月幾何城郭重來人
民猶是鍛乃戈矛礪乃鋒刃士用命焉剪其荆棘驅其
狐狸國之靈也孤蹤奚取上賞首頒靡容考父之循牆
固俾鄭僑之受邑夢寐九天之隔忽到靈清封圻十二
之連增榮廣永侈師中之錫命戴泰內之包荒恭惟某
官間世坤珍清時鼎鉉劃開霾曠當吾道之方春沛作
膏霖副國人之望歲握斗樞而旋轉畫星野以整齊榜
溫國客位之三條見大公之無我備呂相人材之夾袋

雖小善以弗捐運精神於圖回經武之間示指蹤於科
瑣憂邊之際致令庸陋亦被獎提某敢不淬厲冰霜綢
繆陰雨報渥水之圖不七日所祈中主於弱翁課峴山
之積以十年惟恐後慙於叔子

除龍圖閣學士謝宰執

護師軫野愧再歲之罔功進秩奎圖玷三朝之疏渥一
陶有造累牘莫辭竊以中朝學士之班首重西序儒臣
之選希文分陝僅兼寓直之除潞國鎮秦始受為真之

拜以華外服必若前修如某者自信迂愚素非清望執
干戈而衛社矍鑠何能覩城郭以懷人淒涼舊跡幸廟
謨之有賴底疆事之無虞六月王師績愧岐陽之鼓十
年法從夢驚長樂之鐘正嗟辭南城印以靡容雖欲移
北山文而莫遂所期道責敢望躋榮一氣之轉鴻鈞同
宇內陽和之均被三點而足龍字非筆端造化以曷成
恭惟某官千百載之天人八九分之地位調梅而亨鼎
餽同心共濟於時艱連茹而包泰荒多士翕為於世用

以歲終而會吏治當月正而布教條惟一二臣同俱示
寵綏之優渥以六十里役亦令精采之作新致使微蹤
例叨明陟某敢不銜恩塊坱畢力驅馳借江漢雅以對
揚知有王休之上報奉河洛符而推測願觀世運之中

興

可齋雜藁卷十

欽定四庫全書

集部

可齋雜藁卷十一至

詳校官庶吉士臣吳烜

主事臣呂雲棟覆勘

總校官庶吉士臣倉聖脉

校對官原任典簿臣郭祚熾

謄錄監生臣連彭年

欽定四庫全書

可齋雜藁卷十一

宋 李曾伯 撰

啓

代漕幙謝丞相得外臺薦

選弃沉淪虧邱山於一簣化爐塊北舉草芥以千鈞遂
令底幙之綴員獲玷外臺之合穎恩深埏埴感著輪囷
竊以世當清明之時是雖舒翹揚英無一善之或棄士
生貧賤之際然有懷材抱藝為衆人之不知愚嘗覽鄒

陽傳而至先容之辭讀昌黎書而及借勢之語未嘗不掩卷以三嘆固久懷埽門而一鳴然屢獻而售荆璞者有之如片言而乞趙璧者寡矣蓋未有鬼瑣一介之陋冒昧咫尺之恭慨然轉機捷若應響若特達之異遇必瑰竒之偉人如某者家本寒生世無微援訓承弓冶但知誦先人之故書跡陋芻蕘安能建當世之長策勉與時而奔走姑付分之低昂萬里岷嶓落落何所成事一官襄漢碌碌未免因人故其隸銓曹之籍者幾二十年

上考功之第者僅五六載拙於進取誠以迂愚比欠浮
圖之尖敢萌蓬萊之想南溟鯤化方引首於天風北海
鶚騰忽飛音於雲漢遂使老蠶之作繭庶令涸魴之揚
鬐環六路人物之材頓收樗櫟微三階造化之地曷入
甄陶恭惟某官鼎鼐元勲著龜先識佩國家之輕重關
華夏之盛衰端委一堂運乾坤於掌握弼諧二紀新廊
廟之精神既春容以封淮海之鯨鯢方談笑以洗河洛之
荊棘勢隆赤舄志篤緇衣凡申國夾袋之儲莫匪四方

之彥得劉公手書之賜蓋踰十部之賢遂俾么微亦公
薦拔雖出使節非封之采實緣相門桃李之榮某自茲
感切於肺肝唯恐老生於髀肉志氣銷於期會簿書之
細事業泯於塵埃歲月之侵一失其時萬殞莫報儻試
之於繁劇願及此之精彊擁篲執鞭苟覆侈兄弟難逢
之會銜恩結草並當酬父師不及之恩

代謝制帥合薦

數年受察轉移屢費於鴻鈞一日許歸吹送又騰於鶚

表始終拜賜俯仰銜恩惟人材自漢魏以來而論者謂
荆襄之盛四方所會多士知歸然此間自有伏龍微德
操而幾失而治中乃可展驥必魯肅而後知使一時不
際於風雲則二子亦淪於邱壑矧歷觀於近世尤倚重
於上心然而落落臺省之華與夫彬彬麾節之寄類由
幕府薦自朝廷孰云鬼瑣之蹤亦在品題之數伏念某
命如紙薄材乏線長一官勉繼於箕裘千里浪隨於弓
劒功名機會未嘗萌捷徑之心州縣塵勞久已付窮途

之分昔幸受知於玉帳首蒙掄擢於銅章越俎郡符吹
竽帥幄既薦之宸綸搜訪之始復置之漕幕周旋之間
六七載之叨恩所以獎提者不為不厚再三刻之申辟
所以成就者不為不深其如黃楊之運未通雖有丹鼎
之功莫轉鑛金頑鈍正慙重累於鑪錘斷木輪囷詎敢
再希於黼黻不圖薦墨又玷雌黃得非憐去燕之離巢
將必欲窮猿之得木非萬里侯相儒雖乏用於疆陲有
十從事書歸庶有辭於鄉曲恭惟某官詩書元帥社稷

洪勲陝以西召公主之斗以南仁傑而已兼資文武出
將入相古王佐之才乎雜進巧拙登明選公此宰輔之
方也憂勤十載甄擢羣材聯四牡使臣之輝同加公論
示一介行李之重不靳殊褒某敢不踴躍歸程銘藏宏
造飢鷹側翅初無飽則颺去之心駕馬戀軒願使羣無
留良之歎

代謝京西漕合薦

三年服役幸依龍節之華一日許歸誤玷鶚書之寵羽

翰借順頂踵知恩竊稽前史之人材夷考昔賢之事業
定關中之餉者予蕭相稱祁山之漕者曰孔明意必有
於宏規斯可傳於來世及觀舉信則乃數言於國士暨
論薦琬則至再表其正臣始知千載獨得兩公其待二
子猶出一揆不圖今日復見高風伏念某才乏線長命
如紙薄幾載江湖之汨沒一官州縣之塵勞乘鴈雙鳬
曾不繫人之輕重大鵬斥鷃由來付分之低昂粵從井
邑之脫鞴首荷星臺之推轂郡符越俎帥幄吹竽繼縱

更於公車遂使令於賓幕樵蘇千里殊乏婉猷厦屋萬
間僅逃曠戾中荷化工之塊扎嘗加好語之吹噓斷木
輪囷顧不堪於斲削鑛金頑鈍乃屢費於鑪錘其如黃
楊之運未通雖有丹鼎之功莫轉滿船明月方將盟江
上之鷗一紙春風猶俯逆幕中之燕遭逢若此感激謂
何恭惟某官社稷世臣衣冠碩望子孫鄧耿漢氏相與
始終叔姪籍咸晉人稱為大小茲禮樂副皇華之遣而
詩書參元帥之謀樽俎折衝特其餘事弓旌舉善同出

盛心遂騰連璧之書曲示采封之意某敢不服膺弗失
載德以行馬何止戀廢之情鵲尚作依枝之想非班超
萬里侯相進宜無用於疆陲得劉公十從事書歸庶有
辭於鄉曲

代澧倅謝制使列薦

刈漢廣之楚盡得儒英采澧陽之蘭兼收吏隱方一騎
上和門之謁忽四變騰魏闕之章價重泥塗恩濃邱獄
竊以官居半刺乃一介升沈之分世有達尊繫片言取

舍之重顧瞻會府尚論古人士元起於治中皆孔明之
薦也東之用自長史非仁傑則老馬每嗟人材遇合之
素難敢謂公道昭明之復見恍傳盛舉竄掩前聞伏念
某智小學瓶材陳窺管三百年之門戶寂寥無人數十
載於江湖漫浪為吏付分鵬鵬之上下寄身鳬雁之東
西衮衮塵埃頭盡為白碌碌州縣眼孰與青伊兩年在
雲夢之濱幸千里託峴山之府鵲正依月三匝而欲去
馬忽遡風一鳴而俾來誦昌黎于相公之書方愧邱垤

澗谷之奚取擬子厚李尚書之啟將欣蓬瀛崑閬之獲
登不圖未見於江楓乃辱先收於蹊李許樂克於四下
譽出衆驚空伯樂之羣中顏為獨厚僥踰溢美跼蹐銜
休恭惟某官九牧老成三朝師表總平天下之疆域新
大元帥之旌旗晉公威名雖蠻夷君長而亦問司馬德
望凡兒童走卒而皆知方茲清湖海之腥風埽穹廬之
虐焰報功袞舄銘績鼎彝迹稷契心伊周將見千載後
聖賢之懿政由求文游夏況聞一門富道德之流然且

璫璣滿櫝而魚目兼收韶濩在廷而蛙吹雜進遂使頽
川之聾吏亦叨北海之剡書某敢不冰檠平生霜筠晚
節佩鴻鈞之袂北竭駑乘之馳驅諸侯薦人與之諸侯
倘獲升於常調國士待我報以國士誓無負於師門

代謝制帥舉狀

孤舟夜月正憐蘆葦之飄零一紙春風遽得梅花之消
息光華歸路驚喜寒途竊以舉員之難職司尤重譬諸
梓人之有梁棟爭運斧斤亦猶醫者之得參苓何憂渡

勃不倚大造孰憐小材如某者半世浪遊九州客夢少
年之髮已白參軍之衫尚青弓冶一官但知依本分以
無事擔簦萬里豈為得便宜而再來窮猿非擇木而棲
駑馬實戀軒而至廩存虛祿如水寒不食之魚家寄他
州類星稀無依之鵲幸有鄉父師者在輒忘郡僚屬之
寒方拜油幢乃收藥籠賜以黃金百斤之諾繼之華袞
一字之褒喜動粉榆價重葑菲恭惟某官兩朝碩望千
載真儒坤維之委寄方隆鼎席之登庸可俟仕宦而至

宰相行且補天富貴而歸故鄉尤加評月致令噲伍亦
玷韓門某敢不金石此心冰霜其節一經品題便作佳
士終藉吹噓無失名譽善事上官愈重畏謹

謝金州徐帥舉闕陞

書生學三尺法曾微綿薄之勞從事賢十部書遽被袞
褒之寵轉鈞洪造發軔終身竊聞范蜀公有言子弟不
可廣受恩之地呂舜從則曰職事所以為求知之階未
有任屬吏而輒急上官之恭未有處私室而妄萌公朝

之薦若為際遇獲遂生成伏念某猥以疎庸幸奉奔走
栖栖甘筮楚之賤昵昵媿兒女之羞汗血何為駒徒伏
櫪羽翼未舉燕尚戀巢自慚習嬾成拙之形容偶積弄
假得真之歲月一夫決拾雖志激昂衆童爭樵敢貪進
取未效一日使令之役方荷二天臨照之私畏此簡書
凜甚芒刺廣廈不憂其風雨厚德已重於邱山豈期不
了官事之癡兒亦預一經品題之佳士輟樓臺之近水
借桃李之先春然而資稟至庸於粹溫而何有材猷甚

拙謂闔敏以曾無凡茲譽過乎情是乃愛忘其醜筮從
初吉罷易小成恭惟某官正學津梁諸儒標準以一世
龔黃之望致千里齊魯之歸樽俎以折遐衝特為餘事
弓旌以招賢士尤切盛心哀哀行命於補天玉斧少施
於修月遂飛禰鶚亦及楚猴某敢不一飯毋忘辦香必
敬鴻漸於千鴈有無咎雖虞躁進之譏魚躍于淵遐不
作人惟佩曲成之賜

謝制帥舉闕陞

詩書作帥禮羅開皇極之門法律為曹褒袞重王正之
筆政虞躍治立使露錐佩大德之無垠知小已之有造
竊以兒童皆誦君實乃四海之所共宗師父子俱出廬
陵必一世之所謂名士孰謂殊遇獲依賢明其敢託孔
李以登門正欲聯點參之侍席包荒進泰初筮發蒙伏
念某分安布韋勉習弓冶羽翮未就燕尚戀巢汗血無
功駒徒伏櫪棲棲甘筮楚之役兀兀愧燈火之盟辛隨
桃李以結根獲與樓臺之近水密戴二天之覆曾乏一

日之勞深慙習嬾成拙之形容偶積弄假得真之歲月
呂舜從嘗曰職事所以為求知之階范蜀公有言子弟
不可廣受恩之地僥倖為一紬繹再三弗敢以自暴而
棄天庶幾起不振於墜地初無三語掾之益遽拜十從
事之頒意將為後生晚進之津梁故不吝片辭隸隸字之
鼎呂謂好學有文者乃愛人之過譽謂謹身思職者誠
垂世之格言非特感之又佩之可謂至矣且盡矣恭惟
某官道義宗主海宇儀刑輟曳履於鴛堦來分弓於虎

幄六龍初御頓寬聖天子之殿西羣馬皆空盡得士大夫之冀北蓋由歸斯受而無訑訑之拒是以幡然起而皆于于其來覺後覺先不以達於先而後可略成小成大不以舉其大而小或遺遂令不了官事之癡兒亦與一經品題之佳士某敢不謹守家法圖報私恩魚躍于淵遐不作人深被曲成之賜鴻漸于千厲有无咎第虞躁進之譏不負所知請事斯語

謝制帥舉改官照牒

疏道源一勺之水向初筮以發蒙援選弃萬仞之淵今
再索而得坎青氈雖舊華袞載新由骨而肉以知恩自
頂至踵而拜賜喜踰膜外愧溢顏間竊嘗觀蜀道之人
材稽古初之薦舉惟諸葛之擢蔣琬至再表其正臣若
鄒侯之拔淮陰亦數言其國士乃知兩公相去於千載
其待二子皆同於一心罔俾高風專美前哲伏念某讀
書有限涉世未深三年刻楮以何為終日握苗而無助
用資蔭不由科舉雖龜山弗以為偏席父兄而為美官

至伊川則曰非幸嗟童子焉知於夷竈猶學人豈善於
操刀固聞取果未熟而時至自然或謂登山有道而徐
行不倦本未萌進之以寸之念豈自意間不容髮之機
問南溟之釣方妄起鯢化為鵬之想剡北海之墨乃復
叨驚不如鶚之書賜之珍灑之潤溫寵以寶題之獎拂
昌言十六莊誦再三不出家庭敏明何有已荒筆硯雋
博曾無倘令試於小冠寧不傷於美錦飄飄雲氣字字
春風矧竊聽於輿言謂莫難於職剡譬神鼎必九金而

後鑄非黃鐘則衆律之不調四皓未登一夔已足由曲
憐於父稼故俯拾於子薪終始自天生成有地恭惟某
官清時冠冕正學津梁遠分西南四履之封坐釋宵旰
九關之顧昔中國之司馬今天下之富公出將入相兼
資武文真大臣體登明選公雜進巧拙有宰輔方故能
見一善而樂取諸人將使無匹夫之不被其澤遂令乳
臭之小子載為腳跡之門生某敢不冰檠持心邱山戴
德枝烏三匝還依得月之樓臺巢燕重來更託連雲之

厦屋

謝制帥舉改官

一紙春風方許問金閨之訊半輪寒月遽蒙運玉斧之
工政引領以俟時不旋踵而拜賜凡小子有成人之造
皆大鈞推播物之恩恭惟某官禮樂宗工詩書元帥輟
泰階六符之望持坤維十乘之權不忍匹夫若內諸溝
得伊尹君民之念乍見孺子將入於井允同孟軻仁義
之心忠敬足以行蠻貊之邦威信足以服姦雄之膽薄

海黎庶喁喁然望公之爰立中原父老欣欣焉知國之
有人生乎斯時況我多士是宜遊子儀之幕者皆將相
登河汾之間者俱公卿衮衣繡裳富貴不忘於白屋丹
砂赤箭搜羅盡屬於碧油惟強本所以折衝惟薦賢所
以報上如茲德業宜在鈞樞某材類瓦雞學猶刻鵠無
和午之智誤若和奚之舉親乏魏戊之能迺如魏舒之
分屬因循歲月苟且塵埃志雖慕於康莊分已甘於選
穽一兔在野固未免於得人八駿盈廷詎敢希於異顧

方渙先庚之令俾需亥之編拔毛遂於囊中知己歷
三年之久授子房於圯下乃不踰五日之期桃蹊正佇
於陽春梅隴倏回於寒谷遭逢若此稱塞伊何山岳銜
恩敢昧塗原而潤草冰霜厲節斷無改葉以易柯

謝鑾帥舉改官

朱衣選士嘗登元禮之龍門華袞論褒猥玷正平之鶚
表雖臺閭更相於汲引而家庭曷副於品題感浹肌膚
愧形面背竊考歷代薦賢之制雖聞當時同姓之公惟

龐統非百里才嘗辱耆舊龐公之鑒而何武有宰相器
曾膺郡守何壽之知固非厚於私恩蓋皆基於公舉載
經識擢見謂光榮如某者涉世尚疎讀書有限終日掘
苗而無助三年刻楮以何為席父兄而為美官常負伊
川不幸之訓用資蔭非由科舉敢安龜山無嫌之辭猶
學人未善於操刀而童子烏知於夷竈因循歲月苟且
塵埃登山方謹於徐行掘井詎懷於知進萬人逐兔姑
未免於得心一朝獲禽恐亦幾於詭御故寧安於愚分

曾未啓於妄圖豈期篤契好於鯉庭乃獲達姓名於烏
幕久刻楚印遽吹齊竽良以為場屋舉子之時蓋已出
門牆下士之列遂誤點蠅而成畫戟周書馬之闕文頓
使菲葑光聯桃李然而家學何取而惟恐子弗荷薪之
誚幕畫奚長而但深發不恤緯之憂過勤八字之褒曾
乏一毫之稱愛忘其醜譽過乎情恭惟某官斯世羽儀
多士模楷大江之西正派北斗以南一人乘闕上之青
牛喜紫氣一方之久駐訪樓頭之黃鶴類白雲千載之

重來德望已十元結之不如勲名方百子駿之莫及儒
流砥柱障回瀾而東之善類甄鎔有大造於西也敢謂
才不才而言其子乃蒙幼吾幼以及諸人力借羽翰恩
深骨肉某敢不松筠厲操冰檠持身依坡翁以平生是
雖乏豫章醫國之用慕惠勤於退老斷不負廬陵好士
之風

謝四川都大薦辟

外臺聘士千金廣駿骨之求內掾綴員九鼎借鴻毛之

重聽兩端而自擇見一善之不遺輿論稱榮親顏助喜
竊以知己實天下之至重知人尤君子之至難賈石街
玉淆錯以並陳工瑟好竽投合之不偶東野正士而窮
餓無所遇非習之則甘食薺之寒侯喜文人而貧賤所
不知微昌黎則老委途之困信先達片言之予奪係下
士終身之升沈曾謁大鈞兼收小草伏念某未通六甲
僅識一丁少雖勉於箕裘壯已荒於鉛槧駒徒戀棧燕
莫離巢誤同初午之舉親獲與魏戊之分屬嫠不恤緯

深慙肉食之謀子弗荷薪尤愧素餐之誚掘井妄懷於
加進登山方謹於徐行味伊川不幸之言縱弗敢父兄
之席勢佩蜀公廣求之戒寧免以子弟而受恩致雖久
倚夫子之牆未獲一登造父之肆辱公特達不汙瑕疵
既薦之以北海正平之書又許之在南涯處士之選雖
踰券外已拜楮中政虞委分於蓬蒿莫遂託根於桃李
敢期剡墨渚賜雌黃求而不得有得於弗求蓋已出夢
想之外舉爾所知焉知之而舉況未覩眉睫之間曲憐

鳧鶴之短長致狗魚熊之取舍昌言十六嘉獎再三始
終厚德之歸託附誦材之愧恭惟某官聖賢闡奧道義
津梁指金華之石以化羊自是麾斥乾坤之手摘玉壘
之山而市駿少分拊循蕃漢之權學術正而斯有正規
模力量大而宜有大事業扶持壽脈丹心存報國之思
涵養人材青眼寓薦賢之頃顧謂萊庭之契好素依棲
笏之聲華子其子親其親不間體膚之愛老吾老幼吾
幼遂叨羽翼之恩一經品題百倍光燄某敢不冰霜厲

節金石將心儻藉琰壁獲顯價於和氏尚遵郡奏璞
猶思鬻於鄭人

謝制帥特薦

邊邑綴員幸橐鞬而在列閫垣剡薦叨俎豆於其間飛
來一鶚之好音猥玷四夔之異選恩深肉骨感極涕頤
竊聞前輩無以成否而論人盛心惟知賢能之報國孟
明不以一青棄共推子桑之忠左車猶以千慮求卒為
淮陰之用蓋其有能有不能者人也至於或幸或不幸

則天焉非上以真見而別之恐世無全材於此矣不謂
今日之舉得於古人之中伏念某鉛槧寒生箕裘墜族
天賦艱難之薄命人知奔走之粗才千里依劉安希宦
徑之捷兩年牢費將圖縣債之償每虞操刀製錦之傷
不閑擐甲荷戈之事蒼茫沿檄冒昧遐征淒涼絕塞之
悲風黯淡孤城之落日虎頭食肉知無福將之緣馬革
裹屍幾中敵人之手脫命萬死挺身一歸捫葛攀崖徧
歷山谷不毛之境茹草齧雪間無水漿入口之時忘其

見申息之羞來以就街亭之譴謂宜釁鼓以戒覆車既
還舊役之青氈復賜殊褒之華袞融表載出漢軍盡驚
恩波當一洗之餘冷灰有再然之望恭惟某官詩書元
帥社稷重臣功成一紀之星霜名動三邊之草木獨持
鎖鑰關門謹北道之防孰料奕碁局面有西風之異指
授貔貅之勁旅力當蛇豕之逆鋒胷中甲兵之奇敵宜
辟易人間匕筯之落我獨從容方茲趣公袞以詠歸然
且攬儒珍而待用遂蒙推轂亦及傷弓載念某家有雙

親年俱六秩此敬仲所以怯敵而聶政不敢許人我馬
我車竟非書生之技某邱某水惟思小子之遊願借順
於鴻毛俾獲隨於鷁尾念家庭之私請早賜放覺作鄉
里之善人尚知刻鵠更生拜德九殞難忘

謝京西漕舉政績

受容龍節政慙墨綬之卑借譽鶚書載錄青氈之舊意
者得所聞未若得所見是以舉於昔而復舉於今頂踵
恩深肺腑感極竊竊以愛人學道雖並邊邑之吏惟難報

國薦賢以部刺史之奏為重蓋職繭絲者或疎於保障
優撫字者或愧於催科世有孔明乃知奇蔣琬之器時
無子敬未免老士元之材是必得於翹英始不辜於獎
拔如某者未之聞道何所取材戶門雖起於儒家面目
浸成於俗吏功名早歲歎交臂而失之州縣窮途疇引
手而援者棲遲數任奔走四方謂宜為箕必學而姑習
於良弓敢意操刀未能而使製於美錦脩焉歲月墮在
塵埃賴推挽於明臺獲甄陶於大閭七階脫選外叨班

籍之榮千里省親歸絕簡書之畏鼠飲河而已足蠅附
驥以敢期忽拜置郵渚頒剡牘跼躄南容之三復光華
北海之一書首加念於近民末過許於能任曰畫諾曰
幹術曩奚幕辯之可稱謂廉謹謂精明茲特官箴之是
守文浮於實譽過乎情售駿骨以千金重鴻毛於九鼎
得兼隴蜀聲滿楚梁恭惟某官社稷世臣衣冠碩望將
以繼黃河泰山之帶礪暫煩護方城漢水之金湯謀元
帥作三軍爰授韓厥佐戎之任鎮國家撫百姓久推鄴

侯給餉之功豈徒折遐衝於樽俎之間方且收人物於
網羅之下顧斯衰邑密在附庸寂寥數載之中坎坷諸
公之迹藐焉孺子幸未曠官遂風厲於提封用表騰於
魏闕某敢不雪霜厲操山嶽銜恩簾燕重來蓋喜庇身
於大廈輶駒雖陋誓當竭力於長途

謝唐經畧特薦

取六鼇於一舉嘗叨北海之薦書誦四牡之五章猥繼
東州之賢轍培植李蹊之力厚摩挲棠蔭之恩濃謝語

延稽感懷激烈竊以皇華遣使環一道以觀風藻鑑掄
材總六條而察吏汎觀自昔古不乏人帶櫺具以謁勝
之豈無曼倩賦梅花而上味道固有廣平然未如眉睫
一見之間遽乃許俎豆諸公之上一飛鶚表載踵駟原
於古人求之亦無行天下得此蓋寡伏念某零丁墜緒
甄落庸才淒涼燈火之盟汨沒泥途之役一行作吏老
歲月於征鞍千里依人視家山如傳舍蹉悲風木絕想
烟蕪顧於軍旅之舉未嘗乃俾金革之事無避麟堂驂

乘寸畫葭聞犀渚代庖一毫何補數月粗逃於瘳曠二
天曲借於幘幪敢望雌黃乃叨剡墨寵以數十言之過
譽置之二三子之前陳鄭公之轍少推立增聲價蕭相
之規未遠遂玷轉輸既誤陟於郎闈且仍陪於議幕凡
致敝筭千金之重端由華袞一字之褒在小已何以得
斯微大造所不及此恭惟某官正人標準公論權衡頃
漕江東已繼質肅公之軌茲殿南服無媿昌黎伯之碑
皆由憲府之班深繫朝紳之望百年幾見異世同符方

將輔贊明主舉之三代之隆所以汲引善類惟恐一士之失凡登安定之門者無曲學而入古靈之彙者皆名臣孰謂迂疎亦塵笑拔某敢不激昂末路勉勵初心望三仙山縹緲之居恨烟霞之尚隔玷六君子品題之目誓言霜雪以不凋

謝制帥舉著述科

烏幕儲英論薦有千鈞之重鯉庭綴冗揆能無一線之長遽令與文學之科寧免玷賢材之錄恩深浹骨愧溢

厚顏竊以推賢舉吉雖前輩之盛心著書述言豈後進
之能事必老泉之可為荀子始可副廬陵一見之知非
安石之不減楊雄何以辱南豐平生之許士而有志代
不乏人未聞刀筆俗吏之愚而被荷橐近臣之選如某
者智難語上材不及中分安莊鷗之非鵬跡類楚雞之
似鳳秋風吹拂早雖貪桂籍之香春雨離披今已絕桃
源之夢一行作吏萬里侍親正猶漆雕之未能敢謂子
羔之何必駒徒戀豆燕莫離巢每懷伊川父兄席勢之

辭蓋守蜀國子弟受恩之戒不虞鴛鴦亦達龍門未由
上于襄陽之書遽已飛孔北海之表昌言十六稱獎再
三一丁僅識寧博而通六甲未知奚敏而膽矧曾微於
賢譽徒誤見於薦揚文以氣為主而所以養氣者未充
文貫道之器而所以聞道者未熟方愧山下泉蒙之義
初無水上風渙之章後恥王勃前愧照鄰焉敢附清流
之項背遠取居易近舍皇甫若為塵碩德之齒牙際會
自天作成有地恭惟某官兩朝元老千載真儒文章扶

八代之衰德望繫四海之重乍見孺子將入於井允同
孟軻仁義之心不忍匹夫若納諸溝未究伊尹君民之
學行且以五色之線補舜袞暫煩以一丸之泥封漢關
出將入相兼資文武真大臣體登明選公雜進巧拙有
宰輔方遂蒙幼吾幼以及人弗以才不才而言子挈之
膝下置在籠中載念某進非科名仕以資蔭雖大造不
拘於流品而小材恐越於彝規自茲出於陶甄敢不加
之鞭策推明孔道雖莫贊游夏之辭叛去韓門斷不效

籍湜之輩益堅此志毋負斯文

謝興元帥舉文華科

十國為連久願出賢材之錄一行作吏乃令在文學之
科茲儒者之所為榮豈孺子之所能稱恩深肉骨愧溢
汗顏竊以詞華之士雖代不乏材品題之目則文必副
實而況攷之自昔尤不輕以許人太羹玄酒玉笋瓊杯
未為當近代之論奇花美女瓦棺篆鼎不過示當時之
誇惟我本朝以來其間名世者作如師魯變西崑之體

四方由是以推尊非後山得南豐之宗諸公曷為之嘉
賞必可追於古作斯不愧於文稱鼠技何能鴻鈞見取
伏念某狀難醫俗骨未換仙向雖議妍媸於卅角之中
今已悔雕篆於壯夫之後丁頭粟粒大略類俳藥褚醬
蒙旁觀貽笑勤哉父稼荷以子薪每嗟莊鷖之非鵬敢
謂楚雞之似鳳依紅泛綠空塵掾吏之流對白抽黃已
廢書生之習幸趨風於烏幕素締好於鯉庭顧初無楓
江之句以聞名又曾乏梅花之賦以見意璵璠橫道瓊

甌窳庸桐梓成材菲封盡棄乃不遺於小藝亦俾在於殊科豈非憐陸沉如海之官途將使起灰冷於冰之門地褰踰華袞好甚縑衣然而文以氣為主而所以養氣者未充文貫道之器而所以聞道者尚淺方寄人之籬下乃出公之籠中未見歐陽遠取居易攀龍附鳳式諧平日之心舍魚取熊屬屢小人之腹若為修飾獲與作成恭惟某官王室金湯帝宗柱石一節不移於夷險四海倚為之重輕錦守漢關坐制黑水梁州之域弓分晉

幄久寬青天蜀道之憂以王事孔棘之初正人物如林
而起順鴻遇風巨魚縱壑行當明良會遇之時白駒空
谷振鷺在庭九重意氣招徠之選爰副聖天子殿西之
想盡空士大夫冀北之羣至於幼吾幼以及人弗以才
不才而言子致令噲伍俾在盧前某敢不養以山下之
泉蒙取諸水上之風渙推明孔氏雖莫贊游夏之辭叛
去韓門其敢效籍湜之輩益堅此志無負斯文

謝給事李尚書舉智謀科

位常伯龍門盛元禮之名職贅价藩鶚表玷正平之
薦向雖事先生於茲有年矣今得負天下之望為前馬
譽極過情恩深浹骨竊以何世不生才何才不資世人
而無自見之心所能未必用所用未必能士始有不遇
之嘆故百里奚嘗愚於虞矣事秦而乃以智聞彼李左
車豈負於趙哉至漢而斯以謀顯有志之士太息於斯
方將聚眾賢而強本朝觀千歲而審今日苟非其匹不
在此科伏念某銖落無奇輪囷寡用子荷薪之弗克勉

繼世官發恤緯之不遑知勤王事退鷁屢嗟於折翅飢
鷹未免於依人斜谷祁山早歷梁岷之天險方城漢水
繼登晉楚之戰場緬懷孤雲念母之心宜絕匹馬從戎
之想載遊幕府又在淮壖披荊棘之蒙茸歷烟蕪之蒼
莽危機虎口薄命鴻毛丹心歲月之消磨縞鬢風霜之
剝落偶闌垣之沿檄叨戎監之綴員聽長樂半夜之鐘
未能弛擔訪武昌西門之柳又俾問津正惟下士之沈
淪盍叩中臺之拔擢片辭治躍一旦甄收嘉獎再三酬

兼金於鼠璞昌言十六節斷木以犧尊顧久登夫子之
門牆茲始授祖師之衣鉢一經賞識百倍聲光恭惟某
官坡潁流風濂伊正派自振南床之風采益深中宸之
東知水鏡掄才共仰山公之啓事天臺弼教一清子產
之刑書矧侍經陪昕幄之遊而批敕振夕闈之職埴培
相業涵養人材觀大節必於平時高誼每從於疇昔謂
他人豈如同姓盛心猶軫於故家凡寸長片善以兼收
故小智廣謀而亦取某敢不勉殫駑力圖報鴻私問形

勢於上流懼莫赴投機之會轉鈞陶於大造冀終依播
物之恩

謝總領舉智謀科

執鞭玉帳投身甘五齊之間抗牘金臺論薦在十科之
首受知特達揆分僥踰遭逢大異於等倫感激幾填於
胸臆竊以同前篇顧方思古人而獲我心敢謂觀千載而

審今日若為庸繆乃在推揚伏念某鹿鹿無奇魚魚自
守少也已歷戎馬間關之役壯而愈更江湖奔走之勞

子弗荷薪雖莫追素餐之誚發不恤緯顧每慙肉食之
謀栖遲數仕之塵埃牢落半生之歲月竭遊楚幕隨在
阮厨初何知折衝樽俎之中是不過濫觴糟粕之末清
秋帽底徒憶孟嘉落日樓頭難追王粲政類飢鷹之側
翅願為倦鵲之依枝詎謂雌黃遽加剡墨寵以昌言之
十六為之嘉獎者再三材愧龍眠敢玷南陽之人物詞
慚鸚鵡曷膺北海之薦書一出品題百倍聲價恭惟某
官搢紳模楷廊廟羽儀祖孫唐之徵謇叔姪晉之咸籍

青霄接武光騰太微帝座之躔翠節披圖奄有嶺海洞
庭之域方用大學理財之道將為皇極經世之規浪擾
三江屬未鱣鯨鯢之肉烟橫萬竈矧方張貔虎之頤人
皆凜然有急迫之憂公獨處之如閒暇之日方且招徠
四方豪雋之彥愛惜一夫汨沒之羞雅量并包無工瑟
好竽之難售群品甄別微賈玉街石之易欺遂使低飛
亦蒙遠取某敢不冰霜砥節邱獄銘恩舉堯庫七十家
已副平時之附麗望門牆數千仞尚祈異日之作成

謝夔憲舉練達科

登天而上蜀道慚非油幕之玳簪乘月而下渝州忽入
繡衣之玉斧一玷明臺之題品倍增行路之光華何物
么微辱公薦舉竊以才雖因試而後見事非久歷則未
精故金以鍊而始堅而繒非練則不潔聞諸前輩蓋有
格言或云以事練心則喜怒哀樂應對起居而不亂或
謂以變練節必煩苦雜擾閑冗倦辱而後成信知人才
淬厲上固有方非得世故老成士豈輕許若為末學而

在殊科伏念某涉歷甚疎講磨未熟跡類楚雞之似鳳
分安莊鷄之非鵬弗肯獲弗肯堂姑藉畬菑之業胡取
困胡取億菽聞稼穡之勞燕雖久於幕中駒尚甘於轅
下甫依茗節適玷棘闈遂叨捧檄以便親因獲負書而
過里堂堂機會徒抗志於雲霄滾滾塵埃方棲蹤於風
雨偶值小人之役來登夫子之牆豈期一見而賞朱絃
不待片詞而得白璧昌言十六嘉獎再三雖駿菽受
叔向之知孟明辱子桑之舉北海上正平之表東野得

習之之書未有遭逢如此特達稱之天下以難遇當於
古人而是求恭惟某官道之淵源學者山斗堯陞早聯
於鵷鷺周原暫駕於駱駟弼教明刑俗已巴涪之化薦
賢報國士皆齊魯之歸然而枏櫨楓柞惟匠石是求芝
朮參苓在藥籠不乏曷致才不才而言子亦蒙幼吾幼
以及人立借齒牙俾生羽翼某敢不冰霜厲節邱嶽銜
恩萬里旋歸已借長風之吹送平生附麗尚知小草之
相依

謝史尚書應詔舉兵機科

求文武之士如不及上方廣從橐之洛學軍旅之事則
未聞孰謂在公車之薦塵埃一介俎豆四夔眷人才自
昔以難知如兵事在今而尤重謂卻縠可帥端由閱禮
以崇詩得元凱其人豈必跨馬而穿札若孔明之表向
寵暨安石之舉謝玄皆能識萬里之戎情張三軍之士
氣以之應今斯謂得人如某者鐵硯違心鉛刀誤手幾
輒費平生之履一官類上水之船不能效海翁之鷗舞

而弗下未免聽東野之馭盡而猶求栖栖籬落之依人
汎汎巾瓶之委分凋零鬢雪牢落心灰顧久登夫子之
宮牆素獲事長公於幕府悲風絕塞落日孤城血軀屢
付之鴻毛肉相終非於燕頤災生福過創鉅痛深已甘
土木其形骸敢作燈碁之夢想調公鼎鼐何如一手之
陶鈞著生衣裳更傍誰家之門戶魯侯之不遇天也周
南之獨滯命夫敢期塤箎一意之生成未忍溝壑匹夫
之擯棄取諸申公夾袋之數置在古靈薦橐之間華袞

過褒青檀增重復不遠而無祇悔蓋令速悟於迷途泰
包荒而弗遐遺益見兼容於偉度有恩如此其忍負之
恭惟某官學者泰山國之元氣父子韋平之事業弟兄
坡潁之聲名尹正黃圖人服神明之政論思紫禁天開
輔相之階絲綸四美不邁前聞衣冠一門見謂盛事密
勿星辰之曳履春容風雨之對床大而計安社稷皆扶
持憑藉之規小則薦進賢才為奔走鼓舞之地遂令鬼
瑣亦被品題某敢不金石初心冰霜晚節移首邱之一

死咎大造以終身失東隅而收桑榆固未遲於報効遇
中原而奉鞭弭尚願畢於馳驅

謝吳侍郎舉監司科

位隆漢橐俶觀推轂之公職佐淮藩誤許乘軺之選是
雖事先生於茲有年矣今得負天下之望為前焉好語
過褒慚顏祇厚竊謂薦士雖由於公道知人必在於平
時元城從溫國之遊以無書而見取伯長本晉公之推
因不揖而致銜此安於分義者略同而取之故舊者則

異乃知先達拳拳於汲引不待後進切切於攀躋升沈
付之遇否間耳孰謂雅道凌夷之後尚存昔賢篤堂之
風必惟其人可副此舉如某者少有遠志壯無奇稱屢
折翅於文場幾埋頭於吏鞅周旋四塞弓刀之役是親
漫浪一官筆硯之事盡廢風霜剝落歲月消磨髮種種
分奚為心耿耿者徒在孤雲念母匹馬傍人其間機會
輒交臂而失之未有介紹為舉手而援者偶緣捧檄何
意彈冠雖昔在於岷峨嘗首瞻於泰華尋梅載酒對月

登樓熟聞帷幄之雋談已識巖廊之雅量嵇紹不孤矣
徒深著於丹衷范叔無恙乎詎必期於青眼豈謂念蓋
帷之敝質垂車笠之高情錄之少常伯薦舉之科期以
部刺史選掄之備昌言十六嘉獎再三售鼠璞以兼金
飾犧尊於朽木幾年執御僅窺夫子之牆一旦傳衣遂
得祖師之派恭惟某官補天大手修月良工父子兄弟
之賢世無與儔輔弼疑丞之望上素簡知方右平左城
之論思暨西掖北門之潤色將雍容於袞烏顧收拾於

履簪如河南之於賈生求能裨於治體若武陵之於杜
牧尤樂取於詞人惟流風遠紹於華宗無片善不歸於
洪造致令樛散亦被甄收某敢不一飯毋忘辦香必祝
進馬周於逆旅倘益借於齒牙依坡翁於平生誓不寒
於肝膽

謝潼漕請舉

衡石程文將使應飛龍之詔鎖廳較藝不期捧薦鶚之
書退循鄒木之輪囷猥與顏金之陶鑄喜踰望外愧在

選中竊惟三年賓比之秋莫重一道計偕之貢不特雜
學校鄉曲以兼取抑亦羣公卿子弟以咸來蓋官版雖
登尚以出身無出身之異故儒科並進而有礙格不礙
格之分初靡為寒畯科目之妨乃以寓貴胄問學之勸
然而肩摩而就者皆欲逐於一兔鑒裁以取者必可連
於六鰲豈容繆悠乃在推擇如某者讀書有限識字未
多向雖習妍媸於巾角之中今浸悔雕篆於壯夫之漸
香飄桂籍僅嘗吹拂於秋風夢香桃源繼已離披於春

雨一行作吏萬里從游雖韓滉未至於棄牆而盧傳每
嗟於東閣非敢效德裕決科之喜正將以晉肅名父
而未能螢案槐忙登府條傳於多士鵠闥棘鎖背城遂
試於孤軍是雖僥倖於一擲之間自覺哀竭於再鼓之
後辭正慙於黃絹物乃復於青氍既得與孔門十哲而
同升又俾在漢傑三人之偕列詞非張鷟誤辱味道之
見稱賦取樊川盡出武陵之加賞蜚好音於乾鵠傳弱
羽於春鷹茗幕增榮萊庭溢喜恭惟某官搢紳模楷道

學淵源孫枝綿指李之芳凡謔擅探花之譽書屏丹地
素知紹興名相之家攬轡青天暫訪元祐正人之閣桃
李連陰於藝苑江山咸集於詩囊舉善推賢益廣魚躍
鳶飛之化黜浮崇雅方新蟲鳴螽躍之機遂令好腳跡
之門生放出一頭地於前輩某敢不益自勉勵謹所操
修遼東鶴歸最喜憑依於風力溟南鵬化倘容奮迅於
雲程永矢弗諼必有以報

謝京西漕請舉

一行作吏無復事於詩書三載賓賢適肇登於行藝仰
明使者盛心之攸屬故寒書生陳態之未忘誤入彀中
端出券外進取蔑無階之歎作成乏有造之歸竊以畿
右一方貢闈久廢屬時中宸聿從科舉之進身肆我外
臺允念邊方之遊學茲舜門之四闢廣漢路以旁招或
出身無出身其有已聯於官版曰礙格不礙格亦令並
進於儒科然當百年曠典之復新必得一代名流而始
稱如某者受材弗穎聞道未豐歌楚些而作離騷曾未

工於少女賦漢京而上校獵徒見誚於壯夫雖載搏鵬
路之翰歎又點龍門之額竭填縣債幾畔文盟韓檠未
忍於棄牆廬傳每嗟於束閣吏庭筮楚甘投分於塵埃
學殖荆榛殆絕交於師友倏覩鳶魚之飛躍輒忘燕雀
之喧啾以不教之孤軍為嘗試之一擲天山三箭雖興
壯士之歌東海六鼇敢希公子之釣恍傳墨榜猥復青
瑣居王後以為榮出馬右而尤過賦慙明水迺入宣公
之品題詞愧阿房驟被武陵之稱賞妄想金花之名帖

榮聯玉筍之門生造化一新光華十倍恭惟某官壯猶
事業皇極經綸胸藏慶厯范老之甲兵世濟元祐申公
之文獻粵持蕩節翕仰福星給餽餉鎮關中自是斯世
金城之重求文武致幕下將為異時藥籠之需故能被
袞繡之貴而弗棄布韋在軍旅之間而不忘俎豆爰復
盛時之場屋曲為晚學之津梁遂俾非才亦叨偕計某
敢不銅章竊暇鐵硯加工仰承漢廣之刈薪更儆宋人
之刻楮寘刑賞論於第二祇愧過情陳天人策而至三

願酬知己

可齋雜藁卷十一

欽定四庫全書

可齋雜藁卷十二

宋 李曾伯 撰

啓

代回安監丞袖啓

以喬木贊三復久知王文正之後人得梅花賦一篇可
卜宋廣平之遠業矧交樂事適在相鄉詎非會遇之天
為是參承之地恭惟某官忠孝衣鉢道義門牆不畏疾
風知是雪山之勁草有如砥柱坐回峽水之狂瀾孜孜

幾年凜凜一節方子陽肆井蛙之怒而臣甫拜杜鵑之
詩碧幢畫諾之間患銷棧道白羽笑談之頃變息潢池
為劉於右袒之呼微管有左衽之歎功高如此上肯負
之禁路晉丞黼袞正思於夜對藩符奏最錦衣胡問於
書游東山之霖雨將歸綠野之清風難屈趨裝可也泚
筆俟焉某冒然登孟博之車幸甚過子雲之宅善人不
得見君子見矣實獲我心一國之所慕天下慕之願聞
其政深慙報玖莫造鳴珂

代回湖廣鄭總領

擔簦上蜀道之天有懷折柳樽俎想南樓之月忽辱寄
梅感久要之不忘愧宵人之莫稱恭惟某官活民敏手
蓋代英名為世儒宗得康成一家之學方古王佐挾子
產列國之材早推鄉老大比之科繼洗柱史惠文之習
車無留跡玉不韜輝平反棘路之華夜沈貫索蔽芾棠
陰之化春藹扶風績用既彰東知益厚遂由郎省薦畀
藩符不五月而齊政以成宜終歲而漢卿可蹤適時餉

計煩上顧憂謂中興建四總之司而武昌任六路之寄
雲屯萬竈日費千金石壕吏歌而久困漏卮兵車行作
而尚勞卧甲必有能稱物平施如謙之用庶幾無傷財
害民如節之宜算度支鞭當不勞於游刃聽尚書履恐
即有於追鋒某謬矣把麾冒馬得節方抵司存之所決
獄幾何遽為王事之行會計而已正猶責無麪於巧婦
何以望不藥於庸醫願垂肘後之規但拯頭然之急迢
迢故國一塵記松菊之思歷歷晴川萬里悵水雲之隔

極深願望幸勿鄙夷

代襄閫回陳總領賀轉官

環十連而建閫猥積年勞冠三品以陞階誤叨宸渥顧
何功而獲此豈無自以致然感臆未陳慶函先辱某壯
而僅爾耄矣奚為偶緣漠北之多虞遂作周南之久滯
中流誓楫雖丹報國之心上馬踞鞍已白憂時之髮徒
倣湟水金城之智少寬棘門細柳之驚秉鉞專征實愧
嚴尤之三策賜書增秩已膺甘茂之十官雖長蛇之勢

若粗雄而黔驢之技已盡展桑陰易徙尊興正濃方虞
貽橫金菑上之譏敢謂進鳴玉禁門之亞其為地者固
有人焉恭惟某官簪橐名家璵璠偉器手袖屠牛肯綮
之刃宵明扁鵲腠理之方總楚分野七十州自位諸侯
之上掌漢大農億萬計夙知九式之規少施鞭算笏畫
之賢勞已見貫朽粟陳之餘裕操贏濟用未誇劉晏之
佐中興給饋論功行踵鄼侯之居第一凡叨序進端自
言揚吾老雖堪一行寧復能裨於烟竈它人不如同姓

尚幾胥濟於風舟

代襄閩回趙夔漕袖啓

勞使臣而歌四牡初覩錦歸來遠方而遺雙魚乃勤袞
字微蹤雖賁隆禮太謙恭惟某官德邁平間學傳伊洛
自禮樂副周原之遣繼轉輸騰蜀道之勲巫峽春風應
聽杜鵑之聲熟延英晝漏已聞振鷺之班催豈徒上益
州中和之詩將盡展宣室治安之策上曰安在何相見
晚願趲前驅公之此行真如登仙佇躋近列某栖遲三

峴留滯十年顧老矣之如斯欲歸歟而曷計暮雲暮野
正深草堂憶白之思夜雪漫江乃動剡溪訪戴之興矧
頒妙語尤佩交情戀戀綈袍徒感故人之高誼依依楊
柳願令戍役之遄歸

回襄陽姜主簿自襄陽司戶兩易

為五斗米未能學於淵明讀十年書不如詣於鑒齒平
時擊節一旦盍簪愧行李之後時辱緘藤之先貺恭惟
某官中原人物故國世臣文雅典刑風尚遺於棠笏吏

事經術訓蓋出於苗裔越由驥騁於康莊便合駕聯於
文陛盍為逸武不憚遠遊意將展風雲之壯懷姑以施
霹靂之大手遷喬而入幽谷雖辭尊居卑而甚迂以防
而易許田然捨彼取此未為失遊戲句稽之丹筆發揮
事業之青瑣鳳覽輝而下之寧棲枳棘鵬搏風而上矣
行趁扶搖某謾學為裘焉能製錦僅若夏蛭之初蛻又
偕社燕之重來保障繭絲方作三年之計簿書期會了
無一日之長幸賢者之同寅竊契盟之有日其來舊矣

夫豈偶然臭味既同欣遂挹芝蘭之馥箴規相警願毋
忘藥石之言

回襄陽胡縣尉

丹綸煥渥黃綬躋榮問南昌神仙之遊若少淹於逸駕
得雍邱聰明之尉且增重於鉅藩著鞭一來擊節三歎
恭惟某官冰壺人物金薤詞章早當長沙年盛之時已
繼嶽麓儒先之派淵源問學我朝安定之從來日月聲
名天下中庸之復見一第直相溷耳萬里豈易量哉五

鳳樓頭盍錦袍之立奪雙鴻灘上乃綵棒之小施意其
歷疆場之事情將以試詩書之功業佇陳席上即露囊
中奏通泉寶劔之篇帝將趣召聽襄陽銅鞮之曲公豈
久留某未及操刀姑學為治面目真成於俗吏姓名不
齒於時流野水歸舟止俟秋風之便天涯傾蓋久俟宿
霧之披忽一鴈之傳音喜二見之斂翼邑人慶我儒者
同僚將為繭絲抑保障乎繼是可承於議論譬諸草木
吾臭味也庶毋相索於形骸

回南障李縣尉

疏恩北闕分理南昌海內第一人謂宜登於清選邊頭
數千里盍俯就於遠游大賢肯臨吾黨交慶恭惟某官
龍門特望鑾殿名流風姿金掌之露凝人物玉壺之水
貯研精書圃歷稽九邱八索之文接武儒科奚止三秀
一門之目盛事入衣冠之記英名騰袞島之鄉上千佛
經見謂莫艱於別所出三昧手果聞首占於倫魁茲殊
知己注於紫宸豈華武可淹於黃綬雙鴻來下五鳳齊

飛某未能荷薪姑學製錦面目真成於俗吏姓名不齒
於清流木杪歸舟致客心之如燕天涯傾蓋喜老子之
猶龍自今擊柝之相聞庶有執柯之不遠尚稽修賀先
辱賜函既見君子則降我心將獲酬於素願豈無它人
不如同姓幸俾附於文盟

回薛督機

命丞相以董師肇開大府東世臣而列屬爰晉上賓當
聲類之相求乃機緣之自至羽言何力藻翰過情若昔

魏公制陝西之師子羽者在葉相視江上之役雍國佐之此一時主賓之良乃百世人物之表緬懷惟舊親見於今恭惟某官梧竹丰標鼎槐文獻精神滿腹漢廷諸老之爭推富貴壓頭魏笏遺風之未遠蟬蛻綺繡之習鵬騫簪紱之津比輟鴈行小遲驥足題輿岸幘了不費於剗裁擊楫著鞭蓋每懷於經濟茲由丞監其贊督師坐決介石終日之機密賴斷金同心之益昌黎之佐裴度淮上何憂王導之得賀循吳人大悅自此未四十而

持麾節不旬月而取侯封由是而升必復其始某壯心
零落倦影沈浮載馳載驅政無能役亦趨亦步茲幸有
依當龍泉出匣之方新顧駑馬望塵而不及少出山東
薛公之策式慰主心俾無隴西李氏之羞實惟公賜

回豐憲謝舉自代

四駢馳隰竭十駕以莫追一鶚箋天忘羣啾而敢儼正
愧微言之輕棄乃勤妙語之粲花洪惟國朝薦代之規
蓋取古者相遜之意昌黎之推韓泰唐人以為美談丙

吉之稱正年漢世亦所間見要必求於勝已始無愧於
知人恭惟某官元祐君子之典刑中興名臣之風烈清
丈振響五英六莖之和偉行軼羣四璉八簋之古蜚騰
英茂繇厯浩繁屬上眷於南陬勤使華之西上仁洽列
城之狴犴化流殊域之梯航駕萬斛舟方此利滄溟之
涉負九金鼎自當為清廟之儲豈惟朝廷深知弱翁抑
亦吏民願借子翼已試若此何官不為某自傾蓋於異
時復同舟於斯地每歎頭顱之如許誰為肝膽之相孚

幸同官而為僚有如夙好不薦賢而報國幾負此心若
將浼焉何足謝者三復琳琅之製倍增忸怩之顏問枚
徐甘泉之班特公餘事效李郭朔方之代副我素期

回象州趙守謝辟

屈名流而宣化政潔於冰奉明詔以舉廉言輕乎羽此
公論之攸屬豈私謝之敢當眷嶺海之一隅去朝廷之
萬里民生瘠薄公計枵虛不堪椎剝之相仍惟務脂膏
之自潤匪資砥柱孰挽狂瀾恭惟某官以國宗英姿時儒

夙望踐駁華貫世故蓋已飽更砥礪前修躬行可以無愧
頃以象臺之虛席小煩驥駕之推麾酌此水懷千金不
易隱之之操昔無襦今五袴共欣叔度之來既聞汙染
之埽清宜藉廉風而表倡官刺史亦榮矣大丈夫何假
為二千石之拊循聊蘇遠俗尺一書之褒召即踐邇聯
某承乏非才周寅有幸知體九重之示訓庶幾千里之
得人輒一疏聞幸將報可闔郡而薦一士清節難哉聞
風而廉頑夫貪庸警矣

回荆門聶守袖啓

我汎涇舟猥來七澤公居楚戶幸共一家駕熊軾以鼎
臨袖驪珠而謙賁恭惟某官播苗世美經濟時才惟澧
有蘭騰馥騷人之國言漢其楚拔尤處士之廬精神檄草
之風生齒頰劒花之霜冷剗裁盤錯游戲夷猶夜觀燈
碁既飽從軍之樂春城鼓角肯甘護塞之勞顧瞻蚡冒
之山林茂蘊駒支之荆棘兵沈刁斗民被袴襦訪山下
之泉蒙寧安新邑取地中之雷復將啓舊邦了偉績於

虎牙振修儀於鷺翽壯圖未艾異渥方來某本乏一能
謬共二事王室相期於共獎交邦允協於和衷敢布腹
心願依脣輔見子產如舊識請賦草蟲謂平仲善久交
毋忘伐木

可齋雜藁卷十二

欽定四庫全書

可齋雜藁卷十三

宋 李曾伯 撰

啓

回歐陽簿尉謝登科

楓宸賜對桂籍標名書有歐陽生久著漢儒林之傳名
登正元榜載新唐進士之科惟時得人多士增氣恭惟
某官文追渾灝學探精微胸蟠滄海之珠麗抱荆山之
玉授業掌故匪從陳稽古之車射策奉常乃俯拾明經

之芥佇公卿胥此焉出而州縣豈為徒勞某猶憶槐黃
喜傳榜墨慶文風之丕振視曩日而有光奮五百人之
中士尚有觀於器識繼六一翁而後君宜愈力於文章

回胡司法謝請舉

集漕闡之衆雋今與計偕得澹庵之諸孫差強人意有
來好語尤佩高情恭惟某官學有源流士之圭璧健翮
九霄之鶚脩程千里之駒賦水部之梅花方紆新綽訪
月宮之桂籍是特舊醴出手當場摘髭上第某代庖漕

事勸駕賢書水鏡何心自是朱衣之首肯春風得意好
看墨榜之先登

回侯簿尉謝請舉

較藝一臺孰究伏生之誼冠名多士首推侯喜之文方
老眼之增明辱好辭之委貺恭惟某官學能稽古儒以
知兵黃石一編已策勲於韜略青雲萬里猶抗志於功
名欣聞延桂之浮香奚待尋梅而學隱當場出手取第
摘髭某屬漕事之代庖獲賢書之勸駕臚傳北闕豈惟

焦杜之齊芳魁繼東嘉未許周徐之專美

回歐陽解元謝請舉

奉漢科之新詔將與計偕稽孔壁之舊藏宜為舉首有
來好語喜得英才恭惟省元行粹圭璋氣沮金石備渾
灝聳牙之體為閑深演述之文桂子秋風自廣寒而分
種桃花春浪由灕水以問津上第策勲接踵某猥
叨勸駕見喜著鞭月旦評高游刃已恢於餘地風雲路
便一飛佇看於沖霄

回唐解元謝請舉

鵠闌較藝稽六義以成章鶚薦標名偉一鄉之得士有
來好語尤佩高情恭惟省元行粹珪璋氣沮金石自鳳
儀於丹穴宜鯢化於滄溟說詩而解人願共推多識摘
丈而覩天巧獨擅衆長奉常一第之策勲始安兩魁之
繼踵某猥叨勸駕快覩著鞭八桂叢邊已喜香浮於仙
籍百花頭上佇看聲播於春闈

回秦解元謝請舉

大比賢能之獻籍甚多才南方中庸之強哀然為首有
來好語深佩高情恭惟省元行粹珪璋氣沮金石正學
蘊講明之素曲臺加潤色之功桂林一枝盡攬山川之
秀梅花萬里將先雨露之春即鵲尾以載占佇龍頭之
三見某猥當勸駕快覩策勲月旦評高衆雋已為之斂
衽雲霄路近壯圖正在於著鞭

回秦解元謝請舉

較藝鵠聞莫重春秋之筆登名鶚薦允諧月旦之評盛

舉哀然嘉辭謙甚恭惟省元追古作者為時雋才學明
王道之權衡詞擅儒宗之黼黻卻林捷奏已看一枝桂
之芳韓榜臚傳行應五色雲之瑞太平首選淳祐重聞
某猥以典藩幸茲勸駕騰薰蘭馥已騰南國之聲華願
指梅梢再卜東風之消息

回衆解元謝請舉

獻大比之書聿新妙選奏明光之賦喜擅衆芳方老眼
之增明辱好辭之委貺恭惟省元文進古作學邁時流

詞名於七步之成紙價甚三都之貴桂林一枝之秀已
播秋香梅花萬里之遊可占春信佇報韓歐之榜帖重
觀三趙之倫魁某猥以典藩幸茲勸駕鹿鳴周野欣聞
盛事之聯翩鵬化莊溟願見壯圖之軒翥

回蜀士趙解元謝請舉

開南嶠之文闈翕來衆雋得西州之名士獨冠一時喜
老眼之增明辱好辭之加貺恭惟省元追古作者為今
聞人詞源三峽之傾文價兩都之重梅花賦罷帶蜀雪

之清香桂籍名標指嶺雲而闊步青氈載復黃榜立登
某以漕事之代庖獲賢書之勸駕校子雲相如之同異
不難掇於儒科論伏波忠武之是非要當存於公議

回蕭解元謝請舉

考藝臺臺探義氏畫三之學揭名露榜居鄴侯第一之
流喜得英才增明老眼恭惟省元追古作者為今聞人
詞源富筆底之章心法追畫前之旨訪廣寒之桂子仙
籍騰芳指嶺首之梅花春風問詢當場出手上第摘髭

某偶爾代庖幸茲勸駕袖間妙語帶雙泉文字之香足
下修程看萬里扶搖之步

回宗室謝取應

大比興賢合衆材於一道高文得雋列同姓之九人好
語有來雅情甚厚恭惟省元仙潢疏派若木騰芳詞章
有追古之風議論得過秦之體訪廣寒之桂子仙籍浮
香指嶺首之梅花春風試手詞鋒努力儒級摘髭某偶
爾代庖幸茲勸駕雁行肅肅已觀霄漢之聯翩麟趾振

振同作聖時之美瑞

回宗室謝取應

選士麟宗孰擅三都之譽登名鶚薦實開一第之階好
語有來雅情甚厚恭惟省元銀潢的派玉峙高標指嶺
首之梅花春風試手訪廣寒之桂子仙籍浮香努力文
鋒摘髭儒級某代庖漕事勸駕賢書由宗室以進九人
允為盛事搏扶搖而上萬里即展壯圖

可齋雜纂卷十三

欽定四庫全書

可齋雜藁卷十四

宋 李曾伯 撰

啓

代回鄭制置賀生日

歲月逼人又紀白母夢庚之日春秋貴老不遺絳師紀
亥之年佩盛德之益深撫哀顏而增厚恭惟某官詩書
元帥社稷重臣富五千文字於毫端運百萬甲兵於胸
次賡祖徠一禹之頌未誇慶厯之仲淹繼洛中九老之

圖當邁元豐之潞國羽檄方清於戎候兕觥載舉於公
堂好善惟賢得地中山謙之象天言肆筆成水上風渙
之文遂形大雅之辭俾介小人之壽某種種如此皇皇
何之五六十翁宜休邱壑七八千里猶涉風濤客星幸
託於蜀躔壽宿實司於鄭分錫之善頌假以餘年雖短
艇相呼鷗已有定盟之意如敝帷未棄馬猶知報主之
心

代回潼川秦守賀生日

小人不知紀年正嗟劬瘁皇覽揆予初度過辱品題遠
分玉帳之餘輝來問寶屏之寒色三復降歎十襲登藏
恭惟某官岷蜀儒英蓬瀛人物以鰲禁駕墀之望為鶴
林鶯界之遊皇極立扶五福洽彝倫之錫洪鈞氣轉八
荒同壽域之開方黑頭入相之可期乃白首為郎之是
念至塵善頌俯及陳人某咄咄伊何駸駸晚矣已辦雪
水松江之釣尚供祁山斜谷之屯寵以袞褒慙然線短
永懷吉甫頌可繼於清風寄語巴人韻莫賡於白雪

代回黃潛賀生日

指李木而為姓氏政感劬勞折梅花而寄故人過勤存
記深愧無能而老矣不知何德以將之瑟三歎以有餘
筭十襲而永好恭惟某官襟懷雲夢人物蓬瀛以對薇
翻藥之文章有製芝初蘭之風度繡衣青轡久分蜀道
之星黃閣黑頭行近長安之日方將推斯文之壽以壽
國故能汎一已之愛以愛人肯分玉帳之光華遠及寶
屏之哀冷某妄一不肖分三宜休萬竈貔貅初無長策

五湖鷗鷺方問新盟惟綠短之是慙豈衰衰之能稱桑
弧而射蓬矢行藏已付於倚樓瓊玖而報木桃感荷莫
形於刻楮

代回鄭制機賀生日

春草初生正入西堂之夢寒梅未放倏催東閣之詩舉
竿載歌彈冠自壯恭惟某官渥洼驥子阿閣鳳雛依王
儉之紅蓮清猶飲水挺北平之翠竹高合抗雲佇黑頭
躋公相之榮猶青眼念朋友之好某久焉懷土晚益惜

時三邊正急於蜂屯二頃盍為於鶴計清風作頌皇覽
增光桃李不言尚惜陽和之力松筠自厲利期歲晚之
心

代回楊制幹賀生日

伴酒家之遊余方歸計播墨池之潤公有新詩舉筆載
歌垂弧增重恭惟某官學窮洙泗譽壓岷峨對白抽黃
行視鑿坡之草依紅泛綠暫裨虎幄之籌篤荀作之同
僚效史克之作頌某冉冉不知其將老皇皇尚欲於何

之忽得隋珠莫酬衛玖嗟我勞嗟我瘁徒有感於蓼莪
俾爾熾俾爾昌願相期於松柏

代回輔制屬賀生日

指李樹生見方思於老子惟輔果在酌當自於鄉人祝
以大椿慊然小草恭惟某官家藏易傳袖有素書昔使
龍庭穹廬風動令俾虎幄幕檄雲飛方將環禁衛之九
重姑且拜詩壇之一將某久焉懷土晚益惜時正未遑
一壑之謀復何暇四方之想敢期善頌猥及陳人嗟我

劬勞徒增重蓼莪之感事公恭敬願相娛桑梓之年

回蕭漕賀生日

咄咄浮生等一鷗於江漢渠渠高誼勤四牡於隰原寵
以佳章華其初度恭惟某官斯民壽脈當路福星揮斤
堪輿轡攬青絲之寄牢籠今古筆摘黃絹之辭對蘭芷
以續騷指柳薇而懷戌樓登乘鶴從容據夜月之床臺
望呼鷹寂寞念秋風之帽篤交盟於金石寓生意於珠
璣某祇誦宸褒深慚綿薄王事方資於共楫公堂何暇

於稱觥當香山五十三之時何如歸我借崆峒千二百
之歲還以祝公

回安觀使賀生日


余髮種種奚為條驚初度君詩藹藹多態肯念久要佳
哉秋思之可人恍若暮齡之華我恭惟某官氣摩星斗
義薄雲霄挺松柏之後凋話言有味樂正蘭而薄采咳
唾皆香相逢江漢之萍蓬重話岷峨之桑梓後先自浹
彼此生初慚無郢人白雪以相祈乃辱吉甫清風之加

貺盟堅金石調入羽商某祇誦哀哀深慙綿薄燭武老
無能矣願欲何為平仲久而敬之願言勿替

回毛制參賀生日

揆初度以賦騷感人秋思有嘉賓而歌雅寄我春聲後
唱一傳庸價三倍恭惟某官凌雲浩氣纖霧道毫明月
樓頭神交王粲西風帽底僕命孟嘉俯憐蒲柳之先零
悅對芙蓉之初發盟申金石調入羽商顧綿薄之如斯
幾衰華之過矣當香山五十三歲盍歸乎來借崆峒千

二百年願俾爾熾



可齋雜纂卷十四